

Pilersaarusionerq aamma nunaminertat atornerqartarnerat pillugu Inatsisartut inatsisissaattut siunnersuut dd.mm.2010-meersoq.

(Ineqarnermut, Attaveqarnermut Angallannermullu Naalakkersuisumit saqqummiunneqartoq)

pillugu

Attaveqarnermut Ineqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Justus Hansen, formand, Demokraatit
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Kaali Olsen, Inuit Ataqtigiit
Inatsisartunut ilaasortaq Anders Olsen, Siumut
Inatsisartunut ilaasortaq Malik Berthelsen, Siumut

Ataatsimiititaliap siunnersuut UKA 2010-mi ulloq 28. september 2010-mi siullermeerneqareermat misissorpaa.

Siunnersuutip imaa siunertaalu:

Kommuninut ataatsimoortumik tapissutit ikilineqarnerat pissutigalugu atuisut aningaasaliisinnegartalerinissaannik kissaateqarnerq siunnersuummut siullertut tunngaviuvoq. Inatsisartut siusinnerusukkut peqqussutaata nalunaarutillu ataatsimut allanneqarnissaat tullertut kissaatigineqarpoq, taamaalilluni inatsit paasiuminarneruleqqullugu atuisunillu atoruminarneruleqqullugu. Nunaminertanik atugassiissutiginnermi sulianik suliarinninnermut akiliummik akiliisalerneq inatsisissatut siunnersuut aqutigalugu atuutilersinneqarpoq. Nunamik piginnittussaataaneq pillugu inatsisisigut inissisimaneq siunnersuutikkut allanngortinneqanngilaq.

Taamatuttaaq naammagittaalliuuteqartarfiup qanoq katitigaanissaa pillugu siusinnerusukkut nassuiaatit peerneqarput. Taamaalilluni naammagittaalliuuteqartarfiup naammagittaalliuuteqartarfimmu assingusumut siunissami ataatsimoortinneqarsinnaanera mattunneqanngilaq. Aamma inatsisissatut siunnersuummi § 62 imm. 2 naapertorlugu

kommunit allaffissornermut akiliummik akileeqquisinnaanerat inatsisissatut siunnersutikkut atuutilersinneqarpoq.

Inatsisartut siunnersuummik siullermeerinerat

Siunnersuutip siullermeerlugu oqaaluuserineqarnerani siunnersuut Inatsisartuni partiinit tamanit annertuumik taperserineqarpoq.

Sulianik suliarinninnermut akiliutip annertussusissaa apeqqutigineqarpoq. Akiliutip annertussusissaa kommunit namminneq aalajangersinnaagaat Ineqarnermut, Attaveqarnermut Angallanermullu Naalakkersuisup paasissutissiissutigaa.

Akileraarutit akiitsuutilluunniit pinnagit akiliut matumani pineqarmat, sulianik suliarinninnermut akiliut aqutigalugu sulianik suliarinninnermi agguaqatigiissillugu aningaasartuutaarpiartut matussuserneqassammata ataatsimiititaliap erseqqissassavaa. Inatsisissatut siunnersuummi § 54, imm. 2-mi allassimavoq ” Akitsuut oqartussaasut suliarinninnerannut atatillugu nunaminertanut oqartussaasut aningaasartuutaannut matussutaasinnaavoq. Akitsuutip annertussusaa assigiinngisitaartinneqarsinnaavoq, kisiannili ingerlatsinnermut aningaasartuutitut tamanut, toqqaannartumik kommunip oqartussaasutut suliarinninneranut attuumassutilinnut matussutaasinnaalluni. “

Aammattaaq aalajangersakkamut nassuiaatini allassimavoq; “nunaminertanut oqartussaasup suliarinninneranut aningaasartuutit tassaapput qinnuteqaatip immersorneqarneranut atatillugu ilitersuineq, paasissutissanik pissarsineq pissarsiniarnerlu, digitaliseeriineq, aalajangiineq, nalunaarsuineq nakkutilliinerlu, tamanut saqqummiineq kiisalu §§ 44-miit 49-mut imaluunniit § 50 naapertorlugit oqartussaasunut kalluarneqartussanut imaluunniit eqqamiunut tusarniaaneq.”

Tassunga tunngatillugu sulianik suliarinninnermi aningaasartuutit piviusut kommunip uppersarsinnaassagai piumasariqarmat ataatsimiititaliap oqaatigissavaa.

Siunnersuutip aningaasaqarnikkut kinguneqarnissaa naatsorsuutigineqanngitsoq ataatsimiititaliap maluginiarpa.

Attaveqarnermut Ineqarnermullu Ataatsimiititaliap inassuteqaatai

Ataatsimiititaliap isumaqatigiittup inatsisissatut siunnersuut akuersissutigineqassasoq **inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Justus Hansen, Siulittaaq

Aqqaluaq B. Egede

Anders Olsen

Kaali Olsen

Malik Berthelsen